



張說之文集卷第十三

贊

蒲津橋贊

孔子堂杜預贊

皇帝馬上射贊

盧舍那像贊

崔日知寫真贊

二法堂贊

般若心經贊

善法堂贊

三歸堂贊

座右銘

精思院天尊贊

煖硯銘

進筆硯架銘

溫泉箴

素盤盃銘

東山記

別楊盈川炯箴

蒲津橋贊

易曰利涉大川濟乎難也書曰造舟為梁通乎險也域中有四瀆黃河是其長河上有三橋蒲津是其一隔秦稱塞臨晉名關關西之要衝河東之輻湊必由是也其舊制橫絙百丈連艦十艘繫修竿以維之繫園木以距之亦云固矣然每冬冰未合春沍初解流澌崢嶸塞川而下如礎如臼如堆如阜或撥或搥或磨或切綆斷航破無歲不有雖殘渭南之竹仆隴坻之松敗轍更之磬不供胥津吏或罪縣徒吉勞以為

常矣開元十有二載皇帝聞之曰嘻我其慮哉乃思索其極敷祐于下通其變使人不倦相其宜授其有司俾鉄代竹取堅易脆圖其始而可久紆其終而就逸受無疆惟休亦無疆惟恤於是大匠獻事百工獻藝賦晉國之一鼓法周官之六齊飛廉煽炭祝融理爐是鍊是烹亦錯亦鍛結而為連鑠鎔而為伏牛膈立於兩岸襟束於中潭鑠以持航牛以驚纜亦將厭水物莫浮梁又䟽其中間畫其鷁首必使奔澌不突積渡不隘新法既成永代作則原夫天意有四時焉濟仁人也利物義也順事禮也圖遠智也仁以平心

義以和氣禮以成政智以節財心平則應諧百神矣
氣和則感生萬物矣政成則又文之經矣節財則豐
武之德矣故天將儲其禎地將阜其用人將盈其力
聖皇之道乾乾翼翼觀藝而無窮詠功而無亟

皇帝馬上射贊

第一

甘泉頓射飛野雞一隻走狐二走兔十四不隔箭連
中五隻

一面昭仁

三驅示武

走則發射

伏則不取

第

中鷹前兔

寒兔滅沒

疾鷹逞巧

鳴鏑洞飛

失雋亡狡

第三

福陽頓同日中狗前兔

狡兔雋犬

力奔勢迫

持圓束飛

捨拔先獲

望賢頓停日射高飛鴈一隻走麋二走兔三十六不
隔箭連中五隻

獸殪山豪

鳥落雲雋

貫三疊兩

血不濺刃

望賢頓中獾狐

夜鳴之鳥

是謂獾狐

除人之惡

應箭而鋪

望賢頓隔馬射中麋

趨趨牙驥 寒草同色 隔馬百步 一縱而側

第四

仙遊頓中麋一走狐三走兔十八不隔箭連中八隻

天子省歛 薄守岐湯 躬射五十 以奉蒸嘗

第五

文山頓射麋不隔箭連中二走狐一走兔二十一隻

我將獻鮮 從禽於野 一日百中 以威天下

武停頓而後射走兔其中射兔十九隻不隔連中十

一隻走狐三走麋

霜兔斗迴 雲龍騰過 天旋月滿 舍矢如破

飛林頓分駿射野狐中

有芄者狐 起帝之祐 分駿遠發 應踣于手

鷄子搗鳩不着飛過在後箭發應弦而落

驚鳶上飛 鷲集橫搏 矯箭爭中 紛然旋落

一箭中兩虎橫貫走五十餘步方倒

雙鹿並去 一箭橫連 上思陵寢 以獻時鮮

是日還宮苑內用大箭射走四十口分賜諸王郡王

及從人等

帝入靈囿 數百麋鹿 射其四十 頒諸群后

孔子堂杜預贊

猗歟杜侯 發揮孔聖 春秋既立 王道以正
列國行事 君子莫之 他人有心 予忖度之
推凡是列 定罪原詞 開我後學 從事先師
金紫光祿大夫太常卿上柱國中山郡公崔
日知寫真圖贊

廓哉中山

霧宇廟徹

逸韻豪爽

達音妙絕

孝盡思成

忠全見節

優游宮侶

蕭條禪悅

白髮傳貌

青松拂雪

要之歲寒

是望邦傑

盧舍那像贊

并序

詩云哀哀父母生我劬勞欲報之德昊天罔極是傷
不可止也戀而懷無所及之感其有飾聖以資親修
法以履慕豈非孝子持明之心哉武擔山靜亂寺盧
舍那丈六鉄像者沙門履徹為先妣用無價黃金之
裝也徹師俗姓劉氏青城真人知古之第道門釋種
守律護戒子如來廣大之心達知來加持之力見虛
空界劃縵茶壇知定慧手結金剛印過去不悟因後
行而追福當來未聞指前緣而證道覩佛相者成一
切智承佛光者壞無始業張說聞其事而憚之乃合
掌西南遙禮偈曰

火雉盧舍那 妙法甚深秘 神變加持力
普昇不動位 孝乎彼沙門 愛母而錫類
法財裝妙色 空色不相異 慧日破金山
慈光觸寶地 善來金剛手 一一見佛事

般若心經贊 并序

萬行起心心人之主三乘歸一一法之宗知心無所得是真得見一無不通是玄通如來說五蘊皆空入本空也如來說諸法空相法亦空也知法照空見空舍法二者知見復非空也是故定與慧俱空中法立入此門者為明門行此路者為超路非夫行深波若

者其孰能證於此乎秘書少監駙馬都尉滎陽鄭萬鈞深藝之士也學有傳癖書成草堂迺揮洒手翰鐫刻心經樹聖善之寶坊啓未來之華葉佛以無依相而說法本不生我以無得心而傳今則無滅道濟文字意齊天壞國老張說聞而嘉焉讚揚佛事題之樂石 蓋田法池寺二法堂贊 并序

法池西三歸院二法堂茲寺長老初上禪師所造也禪師本姓彭俗多知至性至孝執親之喪七日不食復言密行志道探玄究易老莊太一之旨善正書與鍾王同格其精至點畫毫縷必見也折橋苛磨丈石

筋理洒颯固非人力所致也中朝名士山藪高尚法
流開勝遠近暮焉及晚年專意於禪誦平生藝業若
遺塵矣常歎曰帝王父母許我出家雨露生成恩猶
一撥依如來教創是功德萬壹乎獻福二官潜祐七
祖將與一切咸登道場於是三歸堂以長安元年辛
丑子月望日癸未志立善法堂以開元元年癸丑丑
月望日戊辰建禪師母弟仁琬弟子沙門啓疑及沙
彌令哲左右斯業實有焉

三歸堂贊

敬告諸佛子 一心清淨觀 欲求正真道

當從信根入 是佛虛堂相 是法微妙光
定慧不相離 是僧和合義 人空法亦空
二空亦復空 住心三空寶 是名三歸處

善法堂贊

至哉初上人 建立善法堂 彩翠三世佛
莊嚴清淨眼 能運無疑心 普入於一切
見若不染色 知若不取色 是名真實見
亦名鮮脫知 佛觀離生滅 諸法等如是

益州太清觀精思院天尊贊 并序

蜀山劉尊師上清品人也兄學儒弟奉佛迺畫三聖

同在此堂煥乎有意哉遠觀之一致也張說聞其風而樂之作天尊

正氣生神 結氣為寶 上清尊帝 中華首出

華彩衣裳 虛無宮室 紫氣米斗 赤鑪欽日

十天從化 萬靈受禪 蓮花釋門 麟角儒術

法其不二 心同得一 道心惟微 守而勿失

并州勅造座右銘

安萬國 禮百神 放鄭聲 遠佞人

進筆硯架銘

筆硯之間 聖心必察 青蠅導赦 震言漏洩

煖硯銘

筆鋒曉凍 墨池夜結 香炭潛然 推寒致熱

素盤孟銘 并序

國子祭酒常公好遊山水器珍雅素因適湯泉見榎梓枌榆良材蒲谷乃命山工作為盤孟盞罍樽解呈其文理素而不飾還都分遺好事者說受賴盤孟二事以銘之云爾

幽山之木 無心世路 器為盤孟 制以法度

匪丹匪漆 惟真惟素 理直防毀 節全思固

多用必傷 處盈招惡 嗟嗟君子 鑒微在悟

實天是然 貽我朋故

溫泉箴

東山少連曰玄冥氏之子曰壬夫安祝融氏之女曰
丁芊俱學水仙是為溫泉之神焉帝命之救萬靈盪
滯結腑臟達膚溱泄下人多賴之上帝是崇梓飛廉
氏之佚女妬之常欲大恩其功故入溫泉必齋洒心
戒以防患恕以利物含生之疾我願除妖二神嘉之
吹湯激邪珠連漚累滴汨楊華此其効也若入溫泉
僻心穢行惡言淫形居食失節動出躁輕二神醜之
不匡人命飛廉佚女以裾襲人是走疰芒風瘍眩齟

之病夫有意之醫照合神理無恒之醫身為慾使莫
之益傷之者至矣是以君子慎其微也

贈別楊盈川炯箴

杏杏深谷深深喬木天與之才或鮮或祿君服六藝
道德為尊君居百里風化之源才勿驕恠政勿煩苛
明神是福而小人無寃畏其不畏存其不存作誥之
酒成敗之根勒銘其口禍福之門雖有韶夏勿棄繫
轅豈無車馬敢贈一言

東山記

兵部尚書同中書門下三品修文館大學士常公體

含真靜思協幽曠雖翊亮廊廟而緬懷藪東山之
曲有別業焉嵐氣入野榛烟出俗石潭竹岸松齊藥
畹虹泉電射雲木虛吟惚恍疑亭間關忘術茲所謂
丘壑夔龍衣冠曹許幸溫泉之歲也皇上聞而賞之
過命掌舍設帟金吾劃次太官載酒奉常抱樂停輿
輦於青靄佇輦禴於紫雲百神朝於谷口千官飲乎
池上緹騎環山朱旆焰野縱觀空巷途歌傳壑是日
即席拜公道遙公名其居曰清虛原幽棲谷景移樂
極天子賦詩王后帝女宮嬪邦媛歌焉和焉以寵德
也加以中宮敦序謂我諸兄引內子於重幄見兒童

於行殿家人之禮優棠棣之詩作於是實其篚筐宮下
以昭忠信之獻賁其束帛上以示慈惠之恩朝野歡
并君臣義洽夫飛翠華薜茨道至道之主也紆紫綬
期赤松素履之輔也千載一時難乎此遇故兩曜合
舍衆星聚德雅道光華高風允塞寒谷煦景窮崖潤
色猗歟盛事振古未有篆之玄石貽代厥後

張說之文集卷第十四

碑

刺史義陽王碑 祈國公碑

裴公神道碑 文貞公碑

贈陳州刺史義陽王碑

昔高祖之起唐侯華隋命太宗之威四海正萬邦作
潘帝家用建王國二十一族堯之昭也十有一宗文
之穆也王諱琮字某文帝之孫紀王之子龍種異氣
鳳毛秀色仁義天啓德威日就學無不究故齊王之
胤以爵推恩周公之子以才分政捻角封義陽王弱

冠拜歸州刺史又守檀州又撫沂州若赦之舊荆人
是懲單于之衝胡馬自遠淮沂其乂邦國不空遭王
運中微投於南海書稱大去憫失土之諸侯禮不逃
誅義無辜之王子某年月日遘六道酷吏薨於桂林
之野春秋五十神龍之初興廢繼絕追贈陳州刺史
王生不得志沒受遺榮信乎才之短長不如命之豐
約德之輕重不如藝之厚薄有矣季子豫州刺史行
休髻髮羈孤託身炎厲頽是餘慶歸然獨存泣血上
請迎喪遠襲開元四年二月至桂州王同氣三人徃
偕遇禍殞殮無主封樹缺如歲月茫茫盡為野草聞

憐母而失處訪樵童而莫識議者以為不可復得宜
招魂而葬行休拊心蒼吳誓不徒還乃掃亭館設地
席絜齋懇惻覲乎幽報遂頻夜髻像曲示其端夢魯
王乘舟舟分為兩既而適野見東洲中斷因忽悟焉
陰隱微明率此類也又靈堂鏤莖一夕自屈管上有
三指凹迹一竒二並其傍鐵生文理布列成卦衆駭
其異使善易者張法著之曰屈者於文為尸出指者
於義為指蹤一竒二並三殞近闊若引渦山揆之可
以察先王之心矣考夢協卜定處尅辰以其月二十
八日於桂城東洲發見神柩舉體咸備而一節闕焉

行休甚痛惋若自毀裂其夜又夢王告在南洛州厥
明直舊殯而南十有九步沙洲痕下挿而得之安合
如故他日北郭之外收併二叔父焉於是乎驗著夢
之有徵也予予三旒連舳歸飛遙遙百越經途瞻歎
零桂人以為羨談夫至孝潛通精魄昭應果虛無之
見推步而有必窈冥之體尋求而致雖前誌所詳未
有幽感反覆若斯之斯矣以某年月日陪塋於昭陵
禘城妃汝南周氏祔焉禮也妃考曰駙馬都尉梁郡
襄公妣曰臨川大長公主宗周玄胃大君自出左右
圖史循環法度邦有好述室先偕老以王之故薨於

又平到支遮匄大獲珍異首長將吏請遍觀焉有馬
腦大盤希大寶也隨軍王休烈捧盤跌倒應時而碎
叩頭流血惶怖請死公笑曰事有不意何至重王而
害人乎此又文饒之含容邴吉之仁恕也公西擒郅
支北降伏念前後錫馬五百疋僮二百人金銀器物
三千品錦罽織皮六百段公受置庭中旬日散盡此
又趙奢之待士田文之市義也若夫知人以為本感
通以為行善貨以為常散積以為樂古之友道者嘗
從事於斯矣公元夫人河南陸氏兵部侍郎爽之女
也陸氏卒繼室以華陽夫人庫狄氏有任妙之德班

左之才聖后臨朝召入宮闈拜為御正中宗踐祚歸
養私門歲時致禮媼后補天進叅十亂少康嗣夏退
協三從晉朝公卿列拜虞譚之母周官音注近出常
逞之家皇上臨極旁求陰政再降綸言將留內輔夫
人深戒榮滿遠悟真筌固辭羸憊超謝塵俗每讀信
行禪師集錄永期遵奉開元五年四月二日歸真京
邑其年八月遷窆於終南山鷓鳴堆信行禪師靈塔
之後古不合塋魂無不之成遺志也叅立官至涇鄜
二州刺史聿脩厥德人亡道存次子延休并州汶水
令世載文雄家傳草聖次子慶遠協律郎深達禮樂

克掖宮庭初永昌之難王下河南獄妃錄司農寺唯
有芳氏靡屨布衣往來供饋徒行頽色傷動人倫中
外咨嗟目為勤孝王二子配在嵩州及六道使之用
刑也長曰行遠以冠就戮次曰行芳以童當捨芳啼
號抱行乞代兄命既不見聽固求同盡西南傷之稱
為死悌君子謂勤孝者仁之厚也死悌者友之難也
感神者誠之至也此三者有以見義陽之義方賢妃
之內訓繼體之崇德夫如是淳羨上歸乎本朝盛烈
延耀乎邦族安可闕而不飾碑版無文而已哉銘曰
高丘白雲維堯大理函合紫氣維周柱史百代福流

千齡運起富有海內貴為天子聖帝才子於穆紀王
賢王作胤倬哉義陽慎徽九德九德有常允釐三郡
三郡以康明夷于飛丹崖之下梁木其壞桂林之野
不識阡陌無存松檟于以求之人無知者哀哀孝子
眷眷靈夢語妙常閣文徵甄仲南洛占從東洲億中
舊安移禩新棺改贈既克返塋以祚山陵卜云其吉
神心允憑人非地是迹謝名稱青青松栢不顯不承

祈國公碑奉

勅撰

維天命帝子萬邦維坤配乾母萬物以親九族后父
之屬尊以叙百官開府之班取執謙德而光重地者

則祈國公其人也公諱仁皎字鳴鶴太原祈人王子
賓天啓靈仙之族司徒衛漢大忠義之門盛德之後
仁賢繼出曾祖景孝隋屯田侍郎祖詮歙縣男贈汾
州刺史考文洎贈右僕射績戎前列啓迪後人公之
生也膺汾霍之禎體敦龐之度禮樂徂於代襲忠孝
萌於自然克寬克恭不激不傲鑒窮未兆而養之以
蒙智周無際而處之以默故質勝文行過於譽其於
隱德也三年不鳴其會時也一日千里初以翊衛調
同州叅軍換晉州司兵應將帥舉授甘泉府毅遷左
衛中郎將上昇春宮后正妃壺擢將作大匠事時符

工練八材孔脩轉太僕正卿騶訓車攻六飛如舞先
天內禪引伸外戚懷柔畏滿厭劇思閑公既深辭以
職事上亦優之以散秩加特進禮異群公拜開府儀
同三司策上柱國封祁國公邑戶三千實賦三百公
於是寓情宴喜簡跡朝行入告嘉猷密而人莫窺也
陰薦多士晦而人莫知也不自異於當路每同塵於
衆流常語所親曰明明天子擇賢共理瓌瓌姻婭則
無膺仕不識不知樂我而已善矣夫人臣位極遇莫
大焉王曰外舅厚莫重焉而能明道若昧進道若退
事不事而縣解為不為而理會一以無目牛之全一

以無亢龍之悔所謂言合古行中權歟後之人慎終
始而保福祿者固將江通波而蹈高軌也享年六十
有九開元七年四月戊寅薨於京師皇上悼焉設次
大臨輟朝累日榮之以華袞寵之以文飾終追贈太
尉益州大都督賜東國祕器哈襪贈錫率加常禮乃
命尚書彭城劉知柔攝大鴻臚俾之監護京兆少尹
崔琬介為申命詹事南安侯龐承宗持節弔祭左庶
子自知慎倅為公鄉命士更弔迭喻溢巷填街為之
縞素粵以十月初吉塋昭宣公群官執綽祖奠國門
如前會夫天作聖合必起大邦故軒妣美於西陵周

婦表於東海公藩衍之慶祚徹二十或哲或謀或肅
或艾求錫之類也如是元女祥發望雲業參練石內
被蝨斯之德外偃關雎之化門風之至也如彼長子
惟力戴君畢心禦侮奉雲雷之會懸日月之功庭訓
之致也如此高陽有才子八族我盈其二武王有理
臣十人家出其兩稽諸舊史罕或前聞若乃積三盛
事而重之以純德篆于金石垂于億萬宜哉其文字
光華撰錄知旨要則皇帝所為也詞臣奉詔作之其
銘曰

於穆祁公

誕靈信厚

有悼其慶

天之外舅

高以卑牧

盈將冲守

忠焉孝乎

沒而不朽

人之忠孝

其德不回

天俾純嘏

大福特來

責踰九列

榮並三台

祚之玄社

帝曰欽哉

祁公之德

柔嘉維則

令儀令色

小心翼翼

如何昊天

喪此邦式

休問其永

豐石是刻

我思肥泉

孝心罔極

贈太尉裴公神道碑

星辰懸象所以殷時布氣然而行不言之道者天也
文武用才所以勤官定國然而致無為之理者帝也
當高宗之休運任名世之良臣清九流而闢四海代

天工而張帝德歷選前哲豈多乎哉公諱行儉字約
河東聞喜人也其先出乎嬴姓伯翳之後也秦則裴
侯始封漢則侍中受職魏晉之代爵為盛門八裴方
於八王聲振海內祖三望高士族自冀三子尊為州
刺史徽至公六葉代無違德不隕厥問者已大王父
伯鳳周驃騎大將軍光汾二州刺史琅耶郡開國公
大父定高大將軍馮翊郡守襲琅耶郡公諸侯受封
山河傳國天子並理循良克家考仁基隋左光祿大
夫以陰圖王克仗義舊主遭時不利王折名場聖唐
龍興旌淑勵節贈尔州都督命謚曰忠蓋春秋之褒

也公清明本乎世德正性出乎胎教氣潤河靈貌雄
岳立仁孝之道天生而知將相之器與年俱長以高
蔭為弘文生絕事篤學累年不舉房僕射異而問焉
對曰隋室喪亂家乏典籍館有良書探討未遍故少
留耳梁公驚曰驥子志氣凌雲當一日千里其早為
通人之目也如是明經補左屯衛倉曹詔舉轉雍州
司士遷金部戶部二員外曆都官郎中長安令明慶
中與長孫太尉褚河南論及中宮廢立國家憂患有
公伯寮諧行於季氏出為西州史又改金山副都護
又拜安西大都護西域從政七年間窮荒舉落重譯

向化我之獨賢邊之多幸乾封歲徵為同文少卿尋
除司列少常伯官復舊號為吏部侍郎加銀青光祿
大夫自居銓管大設網綜辨職羗才審官序爵法著
新格言成故事上元中長星出天禿髮入塞詔公為
洮州道左軍總管又為秦州鎮撫右軍總管並受元
帥周王節度雖祭公有諫耀武之事不行而方叔帥
師來威之道備矣儀鳳二年十姓可汗匄延都支李
遮匄潛構大戎傲擾西域朝廷憑怒將行人討公進
議曰敬互敗績於茅戎審禮免胃而入狄豈可絕域
更勦王師今波斯王亡侍子在此若命使冊立即路

由二蕃便宜取之是成禽也高祖善其計詔公以名
冊送波斯兼安撫太食公往蒞遺愛治於人心是行
也百城故老望塵而雅拜四鎮酋渠連營而諮酒一
言召募萬騎雲集公乃解鞍以反謀託獵以訓旅誤
之多方聞其無備裹糧十日執都支於帳前破竹一
呼鉗遮匄於麾下華戎相慶立碑碎葉蓋美克雋不
殺而用謀安人以德而去害廓氣授於地表輝皇靈
於天外充國有屯田之頌實憲有燕山之銘詢茲遠
略彼何微也遷禮部尚書加上柱國又特降恩命兼
右衛大將軍夷典秩宗神必據我文昌有將天道存

烏調露中單于可汗伏念外叛大鴻臚蕭嗣業喪律
詔公為定襄道大總管軍至朔州平候相接匈奴故
態徂劫糧以餒師神將出奇張虛勢以陷敵乃偽為
轉運伏其壯士示羸師以隱行接精騎以躡迹寇果
大下援兵奔散驕虜益驚自為得色駭此車牛憇彼
泉井於是箱中兵起千弩齊發要路騎飛一息而至
群胡顛沛殺傷滿野從茲饋軍路無驚者觀夫大漠
無睨穹廬靡所追之逃遯捨之憑凌費日老師兵家
陰送降狀公密上其事人莫知之及如其期舉國歸
附煙塵大起師徒惶惑公徐使令軍曰此是伏念執

溫傳來降非他寇也俄而銜壁轅門釋縛納款帝嘉

厥勲命尚書崔知悌乘駟勞軍備禮獻凱策勲定日

程務挺張虔勗者行軍之偏將世訴言子營逼逐方

降大軍文屬秉鈞忌才下上其手公曰雖不逮群師

之讓力猶耻二王之競功今而殺降後無來者乃封

開喜縣開國公而伏念溫傳皆戮都市是年也伏念

弟元珍權其餘種後叛則天稱制追正宿枉贈伏念

太僕卿程張諸家別故夷族君子以為神理之不可

誣也永淳元年詔公為金牙道大總管未行遘疾四

月二十八日薨於京師延壽里春秋六十有四長子

貞隱早卒嫡孫參互嗣封藐視諸孤哀哀童幼高宗
悼焉贈幽州都督賜凶儀還鄉喪葬官供禮部郎中
監護窀穸之數率禮有加別勅留守委皇太子擇六
品京官一人檢校家事五六年間待兒孫稍成長月
停寵極哀榮禮之厚者澤及存沒義莫重焉太常議
謚博古多能文武表式曰憲其十月葬我憲公於闡
喜之東良原禮也神龍中興朝思舊德贈公揚州大
都督開元孝享宰嗣延恩贈公太尉生不登乎台階
沒追位乎靈宰序四時於下地調三光於上天聖人
神教意在茲乎公志堅慮精神勇識澈藝必討本學

皆觀奧又善測候雲物推步氣象鬼無遯謀靈不藏
用著文集二十卷造草字數千文皆寶傳人間以為
世法又撰譜選十卷又為運營行陣部衆料敵等三
十六訣大聖天后令祕書監武承嗣就家收進以為
祕術豈比馬卿浮華唯留封禪之草劉安虛誕空傳
鴻寶之書而已哉加以汲引沉淪推獎氣類虛懷而
襟帶不設弘亮而蔽府洞開故虎旅雲從詞林響應
若毛羽之崇麟鳳衆川之長江河也在選曹見駱賓
王盧照隣王勃楊炯評曰炯雖有才名不過令長其
餘華而不實鮮克令終見蘇味道王劇歎曰十數年

外當居衡石後各如其言其在軍麾擇帳下之士則
有張知運薛訥閻敬客甘元陳裴思諒王智方呂休
璟劉立意引偏裨之將則有程務挺張勗王方翼崔
智誓党金毗郭待封等凡所進拔盡為名將此則有
道之人倫武侯之賞監也公之送波斯也入莫賀延
磧中遇風沙大起天地暝晦引導皆迷公因命息徒
至誠虔禱徇於衆曰并泉不遠須臾風止氛開有香
泉豐草宛在后側後來之人莫知其處此乃耿恭之
營拜井商人之化城也公在禮闈勅賜善馬及寶鞍
令史奔馳馬倒鞍破懼而逃非公使召之曰知汝誤

耳和神人咸負長才同淪短運季子光庭侍中兼吏
部尚書輔政邕熙致君堯舜孝理發乎陵廟仁澤遍
乎松楸是故妻以夫榮母以子貴尚書先贈方伯申
命上公夫人舊封華陽增號晉國詩云文武吉甫萬
邦之憲上公有焉又曰彼美孟姜德音不忘小君有
焉孝經云立身行道以顯父母侍中有焉合三德而
為家橫百世而濟美信可以言時稱代鏤石刊金者
歟神道前銘薛令所撰且有後命俾余係述馬遷世
家益孟堅之一傳劉寬表基並伯喈之兩碑報德教
忠俱傳不朽銘曰

天生亞聖 祚比王國 文綜九流 武參七德
柔遠服叛 窮西盡北 赫我皇靈 去其蠱賊
仁則不遠 智何不周 如山之峻 如川之流
術與神合 藝將道遊 書來懸帳 賦出登樓
司馬軍陣 宮入網紀 帝嘉常伯 國于闡喜
室其令妻 家成克子 社金傳世 桓珪守祀
神為上台 永介邦祉

故開府儀同三司上柱國贈揚州刺史大都督梁國文貞公碑奉 勅撰

叙曰八柱承天高明之位定四時成歲亭育之功存

畫為九州禹也堯享鳴名播時百穀棄也舜播至德
由此言之知人則哲非賢罔又致君堯舜何代無人
有唐元宰曰梁文貞公者位為帝之四輔才為國之
六翮言為代之軌物行為人之師表蓋維嶽降神應
時間出者也公諱崇字元之姚姓有虞之後遠自吳
興近徙于陝今家洛陽焉烈考長沙文獻公樹勲王
室建旗萬府公純綺而孤克廣前業激昂成學榮問
日流武庫則矛戟森然文房則禮樂盡在弱冠補孝
敬祿郎又制舉高第歷佐濮鄭並有聲華入為司刑
承天授之際獄吏峻密公持法無頗全活者衆進夏

官員外郎即中侍郎朝庭曰能遂掌軍國遷鳳閣侍郎監脩國史始則天人讓王承置醴之顧終以飛龍利見延驂乘之恩自時厥後恒當大任凡三處兵部尚書三入中書令一為禮部尚書左庶子又肅政大夫揔虛武軍兵馬又司僕卿知隴右監牧使出典毫宋常越許申徐潞楊同十郡景雲初以蕃邸舊寮封梁國公食賦百室公性仁慈行簡易虛懷沉愛而涇渭不雜直率徑盡而應變無窮亦推是心以御於物故所蒞必肅廢風偃鷲很化從言不勵而教成政不威而事理去思覩頌來暮聞歌既登邦政卒乘輯睦

及在宗伯神人允諧今之中書是為理本謀事兼於百揆論道揔於三台公執國之鈞金玉王度大渾順序休徵來臻懋德格天名遂身遜拜開府儀同三司崇其秩逸其志也初太夫人在堂公授任西掖頗限局禁求待晨昏優詔既許尋令還職公因請以泣制曰家有令弟足慰母心國有諫臣安可暫闕其後剖符江表敦喻起復衰麻外墨纒棘內毀變禮中權通識所貴神龍之首與聞興復疇其并賦累讓而停夫以革故鼎新大來小往得喪而不刑於色進退而不失其正者鮮矣君子曰忠不忘親仁也哀不違事義

也讓功辭邑禮也濟代全名智也仁以長人義以和
下禮以安上智以周身宜其光輔四帝軒冕三紀池
臺琴筑優游暮齒傳爵土於祚胤保祿位於始終矣
享年七十有一開元九年九月寢疾薨東都之慈惠
里皇上悼焉國人慕焉撫床輟春曾未云比制贈揚
州大都督謚曰文貞禮也十年二月葬於萬安山之
南原在疾也王人賜膳神藥視醫于薨也中使弔臨
羽儀哀送君臣之義厚莫重焉子昇奔思綴遺美以
寘罔極有詔掌文之官叙事盛德之老銘功將以寵
宗臣楊英烈帝乃洒恩仙翰鏤澤豐砥日月照臨於

佳城煙雲變態於神道寶其文字別為群玉之山禁
其樵蘇即表三司之墓銘曰

源深自虞 派別從吳 避地魯陝 居家洛都

神明遠契 兵瀆真符 翊聖斯偶 生賢不孤

仁將勇濟 孝與忠俱 學仞檟植 文鋒迅驅

總安卑位 即騁長途 唯實唯有 若虛若無

再三軍國 一二訐謨 戎柄充重 王綸最樞

兼司任切 久政榮殊 黼藻彌煖 丹青靡渝

以寬容物 以鑒分區 外或形放 中恒禮拘

箴雖緘口 諍亦志軀 但覩渾璞 誰詳瑾瑜

伊咎尺寸	管樂錙銖	名正身遂	言誠願孚
方辭漢祿	更辱齊狙	既積而散	窮歡盡娛
川歸東極	日止西晡	上側旒衣	旁悲路衢
藍田美玉	荔浦明珠	載廣休慶	爰彌典謨
豐碑乃立	盛業其鋪	帝念頻軫	仙毫特紆
鑄金刻石	鳳篆龍圖	七耀光動	三泉澤濡
鈐能叙事	理籌詞敷	求舊銘實	慙殫惡蕪
緬思雲霧	尚想江湖	有道之德	其何以踰
延陵之墓	空此嗚呼	存歿終始	遐哉邈乎
故太子少傅蘇公碑銘盧藏用撰序不錄			

斤斤蘇公	體正含道	稟靈淳粹	為唐元老
忠以衛主	孝以立身	文以經國	惠以安人
司牧九郡	九郡爰靜	平章百工	百工爰整
千載典憲	三朝綱領	上纂先人	五代相國
下垂餘慶	七子令德	帝謂庭碩	伊公是似
接待玉墀	序拜金所	聯華疊潤	佐我天子
於戲彼蒼	國幹云亡	地頽五嶽	天折三光
備禮詔塋	群官會喪	掌史司德	刊銘路磅

張說之文集卷第十四

張說之文集卷第十五
表

請封太山表

請為千秋節表

請置屯田表

禮儀使賀祥瑞表

賀太陽不虧表

賀大衍曆表

請許王公百官封太山表

并批荅

臣說等言臣聞聖人者與天地合德故珍符休命不可得而辭鴻名盛典不可得而讓陛下功格上天澤流厚載三五之盛莫能比崇登封告成理協幽贊故符瑞必臻天意也書軌大同人事也救粟屢登和平

也刑罰不用至理也今陛下稽天意以固辭違人事以久讓是和平而不崇昭報至理而闕薦祖宗億兆之情猶知不可况上帝臨照祖宗顧諟其可止乎願納不勝懇禱敢昧死再拜

朕以眇身欽承丕業十餘載矣夙夜兢惕常以至道未暢元元未安上累先聖之心下受萬方之責何敢議封禪躡岱宗乎今群官所奏靈符歲稔戎狄向風蓋上天降休宗廟垂福豈朕薄德冒以當仁然天休不敢不答廟祐不敢不報王公衆望不可固違將以蒙福謝誠非以成功類帝輒用忘忌祇遂群心

請八月五日為千秋節表并敕旨

左丞相臣說右丞相臣璟等言臣聞聖人出則日月記其初王澤深則風俗傳其後故少昊著流虹之感商湯本玄鳥之命孟夏有佛生之供仲春脩道祖之籙追始尋源其義一也伏惟開元神武皇帝陛下二氣含神九龍浴聖清明摠於玉靈爽朗冠於金天月惟仲秋日在端五恒星不見之夜祥光照室之朝群臣相賀誕聖之辰也焉可不以為嘉節乎比夫曲水禊亭重陽射圃五日綵綰七夕粉筵豈同年而語也臣不勝大願以八月五日為千秋節著之甲令布於

四方群臣以是日獻甘露醇酎上萬歲壽酒王公戚里進金鏡綏帶士庶以結絲承露囊更相遺問村社作壽酒宴樂名賓白帝報田神上明玄天光啓大聖下彰皇化垂裕無窮異域占風同見羨俗勅旨凡是節日或以天氣推移或因人事表紀八月五日是朕生辰感先聖之慶靈荷皇天之眷命卿等請為令節上獻嘉名勝地良遊清秋高興百穀豐熟萬實已成自我作古舉無越禮朝野同歡足為羨事依卿來請宜付所司

請置屯田表

臣說言臣聞求人安者莫過於足食求國富者莫先於疾耕臣再任河北備知川澤竊見漳水可以灌巨野淇水可以溉湯陰若開屯田不減萬頃化萑葦為杭稻變斥鹵為膏腴用力非多為利甚博諺云歲在申酉乞漿得酒來歲甫爾春事方興願陛下不失天時急趨地利上可以豐國下可以廩邊河漕通流易於轉運此百代之利也當今國儲未息靜人業農願留聖意亦嘗賜前階之食承後騎之頤竟唯唯而無一言者豈敢隱情於聖主也正以職在仗衛憂於部五馬上非公議之所囿遊非朝廷之事今昧死上愚

見乞大臣籌謀速下河北支度及溝渠使檢料施功
不後農節謹奉表以聞謹言

禮儀使賀五陵祥瑞表 并各制

右臣等伏以陛下孝通天地親朝五陵拜橋陵則紫
氣見獲白兔甘露降白鵠巢天光清和日色明朗拜
定陵則有景雲見甘露降拜獻陵則甘露被樹祥雲
抱日拜昭陵則先聖見於神遊薦享之際陛下親聞
刻息初進服用樂器自然發聲又素像迴甘露降滋
從祀先臣歷聞蹈舞拜乾陵則有靈草生甘露降日
抱戴之瑞此皆陛下虔誠上感神靈福降四海同歡

萬方抃躍臣等幸陪大禮親覩禎祥無任大慶之至
謹奉表陳賀以聞臣說謹言

朝拜園陵聲中精到深懼虛昧未感靈心今嘉瑞來
臻神無譴怒欽承祥祉兢慶兼懷儒林史官當貢朝
典 集賢院賀太陽不虧表并各制

大史奏太陽不虧聖德上感變災為瑞陽光增暉陰
慝不作休徵之美莫盛於斯臣等無任欣抃之至謹
進狀陳賀以聞謹進

彼日而蝕詩人所醜應虧不變轉異為臧未知天意
降休將或疇人未洽媿無一言之善而同三舍之慶

循省來章用增勵揚

賀大衍曆表

臣說言伏以開元大衍曆天旨裁其紀綱日官考其精要履端更始敬授惟新加以辨五行之序推七精之數明徵聖期實光士德臣又見梁天監中陶弘景著玉匱記云盛德木子以肇來運頃者僧一行璿衡曆得皇家天命成數千年古今祥兆若合符契曆數既在於聖躬卜年又表於長曆莫大之慶獨冠前王臣忝跡儒林預聞昌運無任抃躍之至謹奉表陳賀以聞

卷第十五

張說之文集卷第十六

碑銘

王公神道碑

安公碑銘

冉府君神道碑

華州楊君碑

馮府君神道碑

唐故夏州都督太原王公神道碑

良玉禮神用之西序之器捨之南山之璞罔然不有其珍也君子安命進之扞城之雄退之去國之老墮然不失其正也語夫伏運以行道屬辭以比德亦何代無其人哉公諱方翼字仲翔太原祁人王周之後

也王子以敗狄受姓徵君以遜世為名司徒之濟艱
難義形漢室太尉之圖舉中心盡魏朝聞蔣濟所言
則知尚書志力兄弟繼美覽周書所載則見潁川忠
烈子姪皆封臣節奮揚於百代家聲藉甚於四海大
王父司徒定公秉隋氏之崇也王父駙馬開府文公
裕光朝之懿也考特進慎公仁表皇室之甥也公門
摠四岳之靈帝子分五潢之氣是生時傑鬱為仁紀
公雄姿沉毅凜難犯之色虛懷信厚坦招納之量識
略精斷達應變之權神守密靜堅不奪之節孝友內
地於免懷忠敬外灼於旣冠加以思參造化誠合鬼

神文其詩

武其韜志推此才也以從政焉求無價

矣夙遭家艱哀過柴席京師號曰孝童王母同安長
公主引貴遊之誠示其善端今太夫人徙居郿墅儲
無斗粟庇無尺椽公躬率庸保騷勤給養懇山出田
燎松鬻墨一年而良疇千畝二年而厦屋百間三年
則日舉壽觴厭珍膳矣處約能久不亦仁乎在困能
亨不亦智乎永徽初始宰安定誅豪暴以育人察姦
寃以申冤異政三舉清風一變除滌海都護府司馬
以母疾辭職為姜恪乘便遂徙朔州尚德府果毅歲
餘王本立上書理公國之悖老不宜擯抑有詔徵還

而親不待心與哀絕氣屬禮存詔御醫孟默朝夕診
視免喪逾年僅堪履立樂成公東討新羅薦為將帥
詔公持節雞林道摠管軍停不行授沙州刺史未至
改拜肅州以為慢防啓寇非重閉也乃大築雉堞嚴
備櫓械人知有恃戎亦來威儀鳳歲河西盡蝗獨不
入境隣郡湊稔提挈如雲公傾私泉以資之引激水
以立磴舉火百竈日舖千人遂有芝草藪生豐年屢
降人之詠德刊石存焉裴吏部名立波斯實取遮旬
偉公為波斯軍副使兼安西都護以都護杜懷寶為
庭州刺史公城碎葉街郭迴互夷夏縱觀莫究端倪

三十六蕃承風謁賀自泪汗海東肅如也無何詔公
為庭州刺史以波斯使領金山都護前使杜懷寶更
統安西鎮守碎葉朝廷始以鎮不寧蕃故授公代寶
又以求不失鎮復命寶代公夫然有以見諸蕃之心
搖矣於是車薄啜百唱羣兵群蕃響應蝟毛而豎公
在磧西捷無虛歲震車薄於弓月陷咽麵於熱海剿
叛徒三千於麾下走烏鶻十萬於域外皆以少復衆
以誠動天葛水暴長祭徹而三年涉渡葉河無舟兵
叩而七月水合由是士卒益勇戎狄益懼璽書下問
皇靈遠燦遷夏州都督徵詣奉天宮熱海之後流天

晉臂陣血染袖事等殷輪帝顧而問之視瘡歛歛曰
為國致身乃吾親也妖賊白鐵予據城平以反奉詔
與程務挺討擒之善公有發石壞城之計反風焚柵
之感封太原郡公元珍寇邊受命討擊公以無甲乃
發思造六片木排枹開鈕解合畫為虎文北至開光
與虜合戰若駟猛獸蒙臯比之莫敵也故馬奔駭獲
其二啜桑乾舍利兩部來降初公善書與魏叔琬相
輦工射與趙持滿齊名帝每矚之賜比鳴輦賞深懸
帳嘗獨行入夜有怪人長丈直來趣逼射而仆焉乃
朽木也太宗壯之授右千牛及持滿伏法暴骸公哀

而收葬為執金吾奏劾高宗義之釋而不罪履道坦
坦多如此類適將任帝夔龍為國方虎天下膏潤群
生雲雨惜哉不辰情焉邁侮嗣聖之際太后臨朝有
凶人誣奏公廢后從兄常懷怏怏司刑御史侮丈矯
制不名苛法遷於崖州路至衡山寢疾捐館春秋六
十有三垂拱三年閏正月十九日葬于咸陽原君子
曰斯才也斯望也難乎免于斯之代也周公聖而謗
屈平賢而放賈誼才而謫李廣勞而喪彼天命之紕
紛此人情之惆悵神龍中興以陷酷吏例復官爵孝
為人極忠為令德神之聽之始狂終直信矣有子故

光祿少卿璵今祕書監珣皆篤行純孝慎終思遠說
少也蒙會友昇堂今老矣豈能文旌墓遷司漢籍感
激論都尉之書邕叙彪情追美樹楊公之碣銘曰

上德惟公 氣秀才傑 孝弘世美 忠廣前列

日月心照 江河思決 難地必通 暗機先徹

卓犖文藝 崢嶸武節 歎由宰邑 借恂臨郡

海女避途 山蛇可問 師律三摠 軍聲六振

銳氣入營 長雲出陣 肅將國威 烜赫天外

玉弩方擎 雲旗卷旆 天道茫茫 自古多傷

功存西域 身棄南荒 易簣中路 懸棺反蔽

寶刀主衣 玉玦無光 後有才子 先賢不忘

河西節度副大使安公碑銘并序

公諱忠敬字某武威人也軒轅帝孫降居弱水安息
王子以國為姓世高之遠漢季自河南而適遼東高
陽之受魏封由陰山而宅涼土高陽王同生尚書左
僕射河間公原晤真河間生建節將軍西平公纘從
正西平生龍驤將軍黃門侍郎廣宗侯薛晤微累葉
動華載於魏史高祖何葺器廣宗之子也周開府儀
同三司寧遠將軍肅州刺史張掖郡公曾祖羅方大
隋開府儀同三司皇朝贈石州刺史貴鄉公祖興貴

右武侯大將軍涼州刺史徙封榮涼歸三國公考文
生不仕涼公皇運經綸首平李軌大舉河隍之地遠
通城郭之國寵錫蕃庶冠絕等彝水出渥洼之神文
馬者二千乘山得崆峒之武朱輪者四十人公育榮
盛之門鬱豪爽之氣孝友天至清華玉立幼聚童兒
必為軍陣之戲長交莫俊唯談韜略之書始以良家
子僕射常公待價引於帳不安息軍建奇績解褐授
游擊將軍臨洮府右果毅復以善部統御史大夫唐
公休璟處之前鋒洪源公立異効遷右威衛翊府右
郎將兼新泉軍使進本衛中郎將赤水軍副使兼赤

水新泉兩軍監牧使改會州刺史營田使擢松州都
督防禦使遷左司禦率兼河西節度副大使臨洮軍
使轉鄯州都督使如故其在軍州傾心下士視人如
子無約而親附不言而條理其在農牧大田多稼如
茨如梁思馬斯才有驕有皇輸力四朝一官三紀名
叅禁衛身任壇塲以靜摠繁以逸待寇我無亡鏃之
費敵有不戰之屈咨所謂一方之干城者也享年六
十有六開元十四年十一月二十八日寢疾終位知
與不知莫不隕涕十五年某月葬於烏城之南志公
鄉村先塋也公寬以御衆卑以自牧直而無訐廉而

無劇朋友不聞臧否之言家人不見喜愠之色加以
心淨三業躬勤八戒推是而不行何往不濟初甘州
有舍利沙多禪師道場之四果也嘗云檀越德充於
內神護於外雖冒鋒鏑永無害也及百戰之後啓手
歸全西州士人聞之激厲有子仲璋如璋季璋全璋
重璋庭襲芝蘭喪過藥棘敬奉窀穸備禮儀於文武
撰述家風刻功名於金石詞曰

玉関氣爽	金波秋澈	涼野蕭條	寒山積雪
授靈產義	精勁才傑	孝固純深	忠惟剛烈
負羽從軍	奮飛青雲	麾幢按部	惠流時雨

搃軍挾郡	入文出武	三十年間	式遏戎虜
壇場務靜	非公莫鎮	金鼓氣雄	非公莫震
神山與缺	龍池取駿	霹靂陷營	衝風入陣
勇將知時	仁兵善持	反耕去戰	王者之師
牧馬如雲	叱庾如坻	西軍方壯	東首長辭
振古同嗟	沒而不死		

河州刺史丹府君神道碑

昔者堯舜旣沒文武將墜天縱孔聖誕敷皇極於是
乎恢六藝而正王道舉十哲而闡微言雍也為德行

之目求也為政事之首吾見乎龍翰鳳雛百世而共
貫虎符犀節重世而增華明德之後知其必大公諱
寔字茂實其魯國鄒人也古天子有相氏宅于相土
實曰冉姓蓋氏族之興舊矣不常厥所今為河南人
焉五代祖睢陽公諱道周尚齊南康公主位平南將
軍散騎常侍荊州刺史信州都督高祖軫仕梁太子
左內率荊州刺史齊梁之間荆巫重鎮世善其職江
漢宜之大魯父義城公黎在梁雲麾將軍湖州刺史
入周拜驃騎開府儀同至隋開皇中為旭州刺史大
父黃國莊公諱安昌隋啓平城祚之穀壁唐分蜀國

瑞以桓珪其後改封於黃授信州刺史歷潭州摠管
贈夔州都督烈考天水郡果公諱仁才秩金紫光祿
大夫婚皇室漢南縣主經浦澧袁江陵永凡六州刺
史偉矣哉承家善慶歷代名臣風流載於史官勲業
載於王府公果公季子天玉自出內稟胎教混成之
姿外被門風式瞻之訓從容合度造次皆法生而知
之孝弟也學而知之禮樂也德義如山文章如泉搢
紳之士仰焉宗焉弱冠文學生進士擢第遭家不造
府君痛館五日絕漿三年泣血雖麻葛就禮而樂棘
加入服闋調并州大都督府參軍事丁太夫人憂過

哀終喪有如前制應八科舉策問高第授綿州司戶
參軍轉揚州都府倉曹參軍又舉四科敷言簡帝除
益州導江縣令鴻漸二鎮翰飛三蜀府中之孫子荆
郡內之岑公孝用能據淮距海我庾如坻岷山導江
入境先歎加朝散大夫除鄜州長史仍加關內道支
度使去青城之洞府來白帝之鄜祠命服有輝使車
何重除婺州可馬入謝十武成殿主上以邊庭有事
喜問陳涉宣室清言思逢賈誼公召對蘊籍謀慮深
長春甚前席恩加後命因改怕州長史于時四鎮未
復二蕃猶梗屯田遼寇我馬生郊代郡藏符臨冀北

而誠重漢家張掖比西河而還輕乃徙拜涼州都督
府長史仍知赤水軍兵馬河西諸軍支度使他往伏
龍城雄飛鳥位居半刺史總管邊公乃利溝洫懋麓
藜序菱藁積糗糧均轉輸程力役寬御悅使授方任
能人胥忘其久勞兵不遠其長道雖金方氣映雨雪
不交之地磧路沙霍草木不植之所莫不盡滯穗於
坳拔厭甘瓜於戍時朝廷賴之遷使持節河州刺史
仍營田使崆峒連五郡之壤磧石控九河之源公夙
奉皇華政聞行露高車未至闔境相歡既見君子溫
其如玉率性仁愛由衷易簡推是心也物感斯應觀

恭肅而無競見禮義而興行不言而庶事熙非教而
郡下順故得大田多稼人和歲豐餉軍廩師處勤餘
裕計偕入朝侍宴於長壽殿上謂公曰河州軍鎮要
衝屯田最多卿以足食為心朕無西顧之憂侑以彩
幣錫以文衮及公還州也璽書勞勉王人相繼國家
徑流沙梁弱水收西域護南庭連百萬之兵以濟事
於外不一日而乏者則公之力也無駭入極可謂費
夸文勝之社預平吳蓋知羊叔子功爾宜登元老作
貳大朝止于邊服實孤人望享年七十有一證聖元
年一月十日寢疾終於官舍天子悼焉凶費喪歸悉

命官給是日河隍耆老山谷羗夷及首髻面號奔州
邑雖國亡于堇吏哭蔡遵豈云過也愷悌之化人之
父母及其沒也哀亦如之信矣太夫人金城郡君隴
西李氏江夏王道宗之女也宜此象服爛其盈門嗣
先姑之徽音立庶姬之範則薜華前落葉瘞城隅以
證聖二年正月合塋於河南定鼎原禮也天使馬悲
啓滕公之室人看鶴舞閉王母之墳松栢接於邙山
丘陵對於伊闕石廊將鬪華表何年有子曰祖雍景
龍初擢給事中義侍御史內供奉追惟皇考孝于奉
親忠于事君恭于立身惠于臨人總是四行旁通具

美貽厥孫謀以宴翼于故老之口既絕竹帛之文又
滅揚名兮奈何刊石兮來裔其詞曰

倬哉舟氏 世有仲弓 鐵冠繡服 給事于中

克昭遺懿 樹之家風 於皇嚴考 高明有融

德罔不尊 藝術不涉 嗣武先正 思文載協

建旗千里 逮君六葉 龜顧印房 虵盤綬篋

官以勤積 業因時峻 宰號神明 掾稱親信

驥足既展 熊軒亦軻 邦國海康 京師河潤

出車西域 我君謀之 屯田北假 我君獲之

六軍有饋 其誰度之 一人無憂 其誰樂之

猛獸避德 均遷所莅 靈鳥依仁 霸昇執事

以今視古 名齊績類 天不慙遺 山頽此位

隴首迴望 秦川斷腸 吏人攀縉 哀鴈隨喪

虛靈冀野 行臨惟堂 廟立邊郡 魂歸故鄉

王姬祔墓 禮之終也 水合蛟龍 墳同石馬

地積霜露 烟攢松楸 千載九原 高碑淚下

贈華州刺史楊君碑

公諱至誠字某弘農華陰人也厥初生人為姬伯之
祖同邑命氏有楊侯之胤其後東陵奮而開國西漢
盛而移關門廬隱隱亘連桃塞之上碑闕崑崙蔽滿

華山之下明德之後士有人爲大王父隋直閣將軍
岷蔚撫豪道五州刺史刑國公諱貴大父故古衛副
率慈汾二州刺史

靜公諱

譽考故常州刺史工部侍郎鳴臚卿金紫光祿大夫
散騎常侍太子少師贈儀同三司上柱國鄭國懿公
諱崇敬若夫家聲代業累德積仁故以克隆前統光
啓來葉矣公稟純嘏之粹靈漸軌物之名教端操以
正己崇讓以與人勵精以探道善問以毓德學無不
達藝無不周成童有傾矚之望旣冠爲宗匠之表年
十三調太常挽郎尋補潞王典籤大夫門下執紼橋

山王國詞人曳裾睢苑皆一時之選也明慶中詔郡
國舉賢良公對策天朝無能出其右者遷太子通事
舍人再舉高第徙國子監丞坊監清流才地兼擇東
朝束帶銀榜增華西序漂纓環林益閨高宗接千歲
之統嗣百王之業封岱岳禪云亭稽子舊章俟茲通
傳乃徐公禮部員外郎祀事克明大典攸序建邦分
賦得人者昌吏曹居六官之首永卽盡一臺之妙又
轉公吏部員外郎淮的文昌羽儀冊地丁太夫人憂
去職公至行純篤幾於滅性雖杖經外除而柴瘠加
等門人記其喪禮天子憂其死孝服常授幽州三水

令曳尚方之舄鳴單父之琴志道不矜其大才勤政
無陋其小邑羨聲沉於幽籥惠化匝於周原又應文
擅詞場舉策試天下第一陳聖謨啓沃明主究天人
之際建皇道之極如有用我者其為東周乎朝廷納
賈生之言排汲直於外拜公隴州司馬未及赴官遘
疾卒於長安第春秋若干王祥未施於邦正陳寔近
終於邑長位不充德其如命何神龍初中宗克復丕
業格于文祖迺瞻從臣緬懷先正以公二子在章綬
之列追贈公使持節太州諸軍事太州刺史非夫立
言不朽陰德陽報安有貌諸孤而降旣沒世而榮號

武夫人天水趙氏殿中監武強公某之女也受訓公
宮作合君子言容貴於國史德行循於法度六姻之
內宗焉始有輔佐之力卒延門戶之寄初公之捐館
也九子呱呱裹喪喪位賴夫人是顧是復日就月將
徙宅依仁闔門成訓三十年內八子登朝廷交虎綬
之華門接魚軒之軫某年月日封梁國太夫人景龍
二年五月七日終於長安之延壽里間遂遭家遷播
几筵靡託而今蒙國昭洗情禮獲申以先天元年十
月二十五日合塋於少陵原禮也第二第三子夫人
在堂而沒長子第八子在殯而亡今並列於塋地用

嘉魂魄長子故兵部郎中徵中子前武衛將軍泚永
懷徽烈思勒銘頌郎中昔嘗緒言意感延州之許將
軍今復哀託情深舊館之悲高跡難名短詞莫逮採
諧故老恭存梗槩其詞曰

昂昂楊君

秉心泉懿

大河靈岳

含光毓粹

學妙妍精

文道逸思

行為時軌

言為故事

存蘊令德

沒揚虛位

善慶克家

哀榮乃備

嗣姑稱姒

敬妻曰冀

復有母儀

千載一致

貞墳土壟

同此地芳

烈依封哉

金生碑字

贈廣州大都督馮府君神道碑

夫積德垂裕之謂仁追遠揚名之謂孝仁則慶鍾厥
後孝則榮及其親嘗三復於斯言今於馮君而見之
矣府君諱君衝其先長樂人也釋趙歸秦本家上黨
分燕徙越又據高良自遠祖宗懷化俟業業以至于
大父贈荊州都督益先考高州使君智幾咸以勳績
建勳本郡甲兵雄於一方政化沓於千里君蘊含弘
光大之德守冲默安貞之志秉難進易退之操詣希
聲若訥之道為而不有故物譽難得而禱靜以居常
故世榮無由而及以聖曆之歲終于本城子幼家艱
喪禮蓋闕夫人麥氏備母師之六行履先姑之四德

處順思柔以成婦道及衛亡共伯而魯重敬姜誓以
汎舟之詩遵其闔門之禮季子今冠軍大將軍右監
門衛大將軍上柱國渤海郡開國公力士始自紹亂
來儀上京既遠徙宅之歡爰從倍年之訓感三州之
深義易百代之因生捨馮亭之本枝從高侯之令族
千秋仕漢遂去田宗隋會在秦別為劉氏遇風雲之
感會承日月之光輝茅土答其勲庸貂璫寵其慈母
袂綵衣之貴精誠所感振古難傳噫歎資孝為忠德
心後動引桑霍之深誠慕金張之周密敬以衛王愛
以安親而善不彰官不遂者未之有也由斯言之則

哀樂存乎心不以至音改禍福惟所召不以偏覆及
詩云魯侯燕喜令妻壽母明神勞善人而壽其母也
夫人以開元十七年享年八十有七五月十二日壽
終于京兆之來庭里舍天子悼先賢之晦德嘉侍臣
之克孝思贈從之未崇創窀穸之將及於是詔贈先
府君潘州刺史使備禮飾終招魂合葬是歲也太享宗
廟備謁園陵錫類之恩施于卿士重贈府君使持節
都督廣韶循康等一十六州諸軍事廣州大都督夫
人受邑舊邦啓號南海從夫加贈改封越國夫人哀
榮備于始終寵光洽于中外為子之道何以加焉於

是與兄左衛中候元璉左領軍衛即將元珪等惟舊
業之難名感新恩之梓及思建碑表以永芬芳夫毓
至德以庇後嗣仁之厚者也楊令名以崇祖考孝之
大者也仁為五常之先孝實百行之首貴經教而莫
比標人倫而獨出宜其鑲美金石式旌墳塋無忘清
徽昭示來葉何必會稽江上獨有紀孝之碑安陵廟
前空傳尚德之頌其詞曰

明珠紫貝產於南國代所珍兮允矣君子不耀其德
克全真芳慶流我後高讓迫薪中貴臣兮失輔象服
寵及泉路榮其塋兮孝道不隕勒銘表墓留芳塵兮

張說之文集卷第六

宋 謝安嘗曰人不可不學也人不可不學也人不可不學也人不可不學也

晉 王羲之嘗曰人不可不學也人不可不學也人不可不學也人不可不學也


唐 顏真卿嘗曰人不可不學也人不可不學也人不可不學也人不可不學也

宋 蘇軾嘗曰人不可不學也人不可不學也人不可不學也人不可不學也

明 王陽明嘗曰人不可不學也人不可不學也人不可不學也人不可不學也

清 顧炎武嘗曰人不可不學也人不可不學也人不可不學也人不可不學也





2